

Kangerlussuarmi, Narsarsuarmi Kulusummilu innaallagissamut imermullu nunap sinnerani akinut naligiissarneqarnissaat pillugu Naalakkersuisut 1. Januar 2019-miit atuutilertussamik Mittarfeqarfiit aqqutigalugu naligiisitseqqullugit peqquneqarnissaannik Inatsisartut aalajangiiffissaattut siunnersuut.
(Inatsisartunut ilaasortaq Aqqaluaq B. Egede, Inuit Ataqatigiit)

Akissuteqaat

(Ineqarnermut Attaveqaqatigiinnermullu Naalakkersuisoq)

Siullermeerinnineq

Aallarniutigalugu Naalakkersuisut sinnerlugit siunnersuummut saqqummiunneqartumut qujavunga. Siunnersuuteqartup oqarneratut Kangerlussuaq, Narsarsuaq aamma Kulusuk nunatta sinneratuulli pilersuinermit akeqartitsiviunngitsut, ilumoorpoq.

Nukissiornermut Imeqarnermullu pilersuinermit suliassaqaqarfiimmut pilersaarutip, assigiimmik akeqartitsilernermit ulloq 1. januar 2018 atuutilersumik kinguneqartup, taamaallaat sumiiffinnut Nukissiorfiit pilersuviinut atuunna, tamatumunnga pissutaavoq.

Tamanna nammaqatigiinnerunngitsaq Naalakkersuisut isumaqatigaat, taamaattumillu Nukissiorfiit akigititaasa ulloq 1. januar 2019 aallarnerfigalugu aamma Mittarfeqarfiit sullitaannut atuutilernissaat kissaatigalugu.

Taamaattumik suleqatigiissitaliamik pilersitsisoqarsimavoq Ineqarnermut Attaveqaqatigiinnermullu Naalakkersuisoqarfiimmit, Aningaasaqarnermut Naalakkersuisoqarfiimmit, Inuusutissarsiornermut Nukissiuuteqarnermullu Naalakkersuisoqarfiimmit aamma Mittarfeqarfinnit ilaasortaaffigineqartumik. Suleqatigiissitaliamut siunertaasimavoq, Mittarfeqarfiit qanoq kaaviiartitani annaasaqarnissaasa, annaasaqarnermut Mittarfeqarfiit qanoq aammalu qanoq annertutigisumik ajunngitsorsiassaqaqartinneqassanersut, nassuiarneqarnissaat.

Suleqatigiissitaliami aningaasalersuinermit ilusiliineq, Nukissiorfiit assigiimmik akeqartitsinerannik atuutsitsilernermit atorineqartoq, aallaavigineqarpoq. Taamatut ilusiliinermit Namminersorlutik Oqartussat, suliffeqarfiit 100 %-imik Namminersorlutik Oqartussanit pigineqartut aamma kommunit sipaarutissaat, pingaarutilittut ilaatinneqarput. Tassami sullitat taakkua sipaarutissaat ilanngaatigineqartussaapput aammalu taamaaqataanik sipaaruteqarnikkut kontut pingaarnerit, kiffartuunneqarnissamut isumaqatigiissutit, pissarsiassat aamma ataatsimoortumik tapiissutit naleqqussarneqarnerisigut, aningaasalersuinermit ilaatinneqartussaallutik.

Mittarfeqarfiit pilersuinermit suliaqarnerat Mittarfeqarfiit maannakkut akigititaasa atuunneranni ingerlatseqatigiiffimmut amigartooruteqarfiusareerpoq. Nukissiorfiit nutaamik akigititanut ilusiliinerisa malitsigisaanik akigititat affaannangortinneqassappata, Mittarfeqarfiit innaallagiami imermilu kaaviiartitamik affangajai annaasussaavai. Pisortani aammalu suliffeqarfinni pisortanit pigineqartuni sipaarutissat tamakkerlugit ilanngaatigineqareerneranni, akigititat appartinneqarnerannut aningaasalersuinissamut pisariaqartitat 3,36 mio. koruuniupput.

Kisianni oqaatigineqareersutut Mittarfeqarfiit pilersuineramik suliaqarnera amigartooruteqarfiusareerpoq. Amigartooruteqarneq 3,2 mio. koruuninut naatsorsorneqarsinnaavoq. Taamaattumik Mittarfeqarfiit isertitaasa nunatsinni mittarfiit atorneqarneranni timmisartumik ilaasunut akitsuutineersuunerat, erseqqissassavara. Taamaalilluni ullumikkut timmisartuni sullitat kisimik Kangerlussuarmi, Narsarsuarmi aamma Kulusummi nukissiornermi sullitat atuinerannik akileeqataasuupput. Maannakkut ingerlatsineranut killissaliussat iluanni innaallagiamut imermullu akigititat appartinneqarnerisa aningaasalersornissaanut Mittarfeqarfiit akissaqanngillat.

Taamaalilluni Mittarfeqarfiit annaasaqaataasa matussusernissaannut periarfissat marluinnaapput – akitsuutit qaffatsinnerisigut imaluunniit Aningaasanut inatsit aqputigalugu aningaasaliinikkut.

Nukissiorfiit pilersuineranut akigitaannik siunissami naleqqussaanermi, atuutilersitsinnginnermi aamma Mittarfeqarfiit pilersuineranut akigitaasa sillimaffigineqartarnissaat pingaaruteqarpoq, tamatumani nunatsinni innuttaasut assigiinngisinneqannginnissaat siunertaralugu aammalu Mittarfeqarfiit pisariaqartunut naleqqussaanissamut periarfissinniarlugit.

Taamatut oqaaseqarlutik Naalakkersuisut aalajangiiffigisassatut siunnersuut akuerineqassassoq inassutigaat.